

HILETA ETA OMENALDI ZIBILAK ARAUTZEKO UDAL ORDENANTZA

ZIOEN ADIERAZPENA

Estatu akonfesional edo laikoetan, erakundeek bermatu egin behar dute pertsona eta komunitateen ideologia- zein kultu-askatasuna, are gehiago, kontuan hartuta gure gizartean hainbat ideologia, erlijio eta kultura daudela, eta horien guztien ohitura eta egintza sozialak etengabe aldatzen ari direla. Gaur egungo gure ordenamendu juridikoak, beraz, akonfesionala izateaz gain, norbanakoen eta komunitateen ideologia-, erlijio-, eta kultu-askatasuna bermatu behar ditu. Askatasun horren muga bakarra da Legeak babestutako ordena publikoa errespetatzea.

Toki Araubidearen Oinarriak arautzen dituen Legearen 25.1 artikulua zera dio: «udalerriak, bere interesak kudeatzeko eta bere eskumenen esparruan, auzo-erkidegoaren beharrak eta nahiak betetzen lagundu dezaketen jarduera mota guztiak bultzatu eta nahi adina zerbitzu publiko eman ditzake». Horrez gain, toki erakundeei erabateko askatasuna aitortzen die legeak, beren eskumeneko gaietan jarduteko. Beraz, Ordenantza honen xedea da gizarte zibilaren gaur egungo eskaera bati erantzutea: hileta zibilak gizartearen aldarrikapen bat dira, eta ospakizunak nork bere printzipioen arabera egin ahal izateko beharizanari erantzuten diote.

Erakundeek norbanakoen ideologia-, kultura- eta erlijio-askatasuna bermatu behar dute; zehazkiago, Udalarena da gizartearen beharizan gero eta larriago horri erantzuteko eskumena eta erantzukizuna. Hori guztia aintzat hartuta, hileta zibilak egiteko espazio publikoak erabili ahal izatea xedatu du Basauriko Udalak.

Horren harira, Ordenantza honen xedea da udal espazioen erabilera arautzea, senitartekoek, taldeek edota erakundeek aukera izan dezaten beren hildakoei agur esateko eta haiek omentzeko, eta, bide batez, herritar ororen arteko berdintasuna sustatzeko, norberaren erlijio-sinesmenak edozein izanda ere. Horrela, bada, erlijiorik gabe bizitzearen hautua egin dutenek zeremonia duina egiteko beharizanetik sortu dira hileta edo omenaldi zibilak, eta, finean, gizarteari zerbitzu hobea eskaintzeko xedea dute.

Herri Administrazioen Araubide Juridikoari eta Administrazio Prozedura Erkideari buruzko azaroaren 26ko 30/92 Legea indarrak gabe utzi dute Administrazio Publikoen Administrazio Prozedura Erkidearen 39/2015 Legeak eta Sektore Publikoaren Araubide Juridikoaren 40/2015 Legeak. Bada, Ordenantza honek, araudiotan aipatutako araubide egokiari buruzko printzipioak jasotzen ditu eta, horrenbestez, ezinbestekotzat jotzen da berau onestea: batetik, lotura zuzena duelako eraginkortasun eta efizientzia printzipioekin; eta bestetik, interes orokorrari erantzuten diolako, eta bere xedea egokitu egiten duelako dauden udal baliabideetara.

I. KAPITULUA.- PRINTZPIO OROKORRAK

1. artikulua.- Xedea

Ordenantza honen xedea da hileta eta omenaldi zibilak egiteko aurreikusitako lokal eta eremuen erabilera arautzea Basauriko udal-mugartean.

2. artikulua.— Eskumena.

Alkatetza Udalburutzarena edota hark eskuordetutako zinegotziarena da hileta edo omenaldi zibiletarako gordetako eremuen erabilera baimentzeko eskumena.

3. artikulua.- Hileta edo omenaldia egiteko tokia.

1.- Oro har, hileta eta omenaldi zibilak honako toki hauetan egin ahal izango dira —ez bada tokiok beste erabilera batzuetarako erreserbatuta daudela—:

- Ibaigane Kultur Etxean (areto nagusian), astelehenetik ostiralera, 09:00etatik 22:00etara. Edukiera: 180 lagun.
- Taberna Nagusian (areto nagusian): astelehenetik ostiralera, 18:00etatik 20:00etara. Edukiera: 100 lagun.
- Hilerriko beila-gelan. Astelehenetik igandera, 09:00etatik 13:30era, eta 16:00etatik 19:30era. Edukiera: 20 lagun.
- Iruaretzetan (biltegiaren goialdean, zabalgunean). Astelehenetik igandera, 09:00etatik 21:00etara. Kasu honetan, Eusko Jaurlaritzaren baimena beharko da, bilera-eskubidea dagoelako tartean.

2.- Aparteko egoeretan, beste lokal edo eremu publiko batzuk erabiltzeko baimena eman ahalko da.

4. artikulua.- Gai orokorrak. Eskubideak eta betebeharrak

1.- Inolaz ere ezingo da gorpu aurreko hileta edo omenaldi zibilik egin. Aukera egongo da, ordea, ekitaldian errautsak dituzten kuxak edo anforak egoteko.

2.- Ekitaldiak bi orduko iraupena izango du, gehienez ere.

3.- Eskabidea sinatzen duena izango da legeriak, oro har, eta ordenantza honek, bereziki, xedatutakoak betetzen direla bermatzearen erantzule pertsonala.

4.- Hildakoak Basaurin erroldatuta egon behar izan du bizirik zegoenean, noizbait; bestela, nolabaiteko lotura izan behar izan du Basaurirekin.

5.- Inolaz ere ezingo da eremu bakoitzerako ezarritako edukiera gainditu.

6.- Eskatzaileak bestelako zerbitzuak ekarri ahalko ditu, bere kontura eta bere erantzukizunpean (apaingarriak, musika, proiektzioak, eta abar). Ekarri nahi duenaren berri eman beharko dio Udalari eskabidean, eta Udalak materiala ikuskatu ahalko du. Musikak ezingo ditu inolaz ere 75 dB-ak gainditu. Apaingarriek, bestalde, eremuaren ezaugarriak errespetatu beharko dituzte, eta, gasturik eragiten badute, eskatzailearen kontura izango dira (garbiketa bereziarena ere bai, beharrezkoa izanez gero). Ezingo da inolako publizitaterik egin, ez eta jokaera homofobo edo xenofoboak sustatu. Ezingo

dira hizkuntza edo irudi sexistak erabili, eta ezingo da inolako sinbologia politikorik aipatu.

7.- Udal lokalak egokiro zaintzen direla bermatzeko, Ordenantza honetan eta legerian jasotako betebeharrak betetzearen erantzulea izango da eskatzailea, bai apaingarri dagokionez, bai edukiera kontrolatzeari dagokionez, bai garbiketari dagokionez (eremua garbitu beharko da ekitaldia amaitu eta gero, behar izanez gero). Bestalde, zeremoniara doazenek ez dute eremuari kaltea eragin ahal dioten egintzarik burutuko; eremua kaltetuko balitz, baimenaren titularrari egotziko zaizkio hortik eratorritako gastuak.

8.- Ahal dela, eta aintzat hartuta ekitaldia egingo den lokalak dituen bitartekoak, Basauriko Udalak baliabide osagarriak hornituko dizkie eskatzaileei: aulkiak, argindarra, oinarritzko megafonia... Udal langileek antolatuko dituzte baliabideok, eskatzailearen edota hark izendatutako pertsonaren laguntzarekin.

Ekitaldia eta omenaldia Iruaretxetan egiten direnean, aire zabalean, Basauriko Udalak ez die inolako azpiegiturarik hornituko eskatzaileei.

9.- Eskubide eta tasen ordainketa, bai eta dagozkion hobarien aplikazioa, eskabidea aurkezteko unean indarrean dagoen ordenantza fiskalak xedatutakoaren mende egongo dira. Ordainketa, bestalde, ekitaldia egin aurretik egin beharko da. Ekitaldia Iruaretxetan edota hilerriko beila-gelan egiten bada, ez da tasarik ordaindu beharko.

10.- Ekitaldia Kultur Basauri udal erakunde autonomoaren kultur-etxeen, gizarte-etxeen edota instalazioetan egiten bada, horien funtzionamenduari buruzko araudia errespetatu beharko da (2010eko ekainaren 14ko EAOn —111. zk.— argitaratu zen).

2. KAPITULUA.- PROZEDURA

5. artikulua.- Eskabidea.

1.- Eskabidea egin beharko da Basauriko Udalaren eredu normalizatuaren arabera. Bertan, honako hauek jaso beharko dira, ezinbestean:

- a) Eskatzailearen izen-abizenak, helbidea eta identifikazioa.
- b) Hildakoaren izen-abizenak. Heriotza-ziurtagiria eta, beharrezkoa denean, errolda-egiaztagiria ere erantsi beharko dira.
- c) Ekitaldia zein tokitan, datatan eta ordutan egin nahi den. Toki bat baino gehiago aurreikusiz gero, lehentasun-ordenean zerrendatuko dira.
- d) Ekitaldiaren iraupen estimatua.
- e) Ekitaldiaren deskribapen laburra, eta, hala bada, Udalari eskatutako materialarena ere bai.
- f) Ekitaldirako zerbitzu osagarrien deskribapena (apaingarriak, musika, proiektzioak, eta abar).
- g) Eskatzailearen sinadura.

2.- Eskabideak ez baditu adierazitako datu edo baldintzak jasotzen, interesdunari errekerimendua bidaliko zaio ahalik eta lasterren, ekitaldia egin aurretik akatsak zuzendu ditzan, edo falta diren agiriak entregatu ditzan.

3.- Eskabidea aurkeztu beharko da ekitaldia egin baino 24-48 ordu lehenago, gutxienez, eta heriotza gertatu eta, gehienez ere, 30 egun naturaleko epean.

4.- Hileta zibilak egiteko eskabideak berehalakotasun-printzipioaren arabera izapidetuko dira (egoerak hala eskatzen baitu), eta dagokion atalera bidaliko dira.

5.- Eskabidearen arabera finkatuko da hileta bakoitzerako erabili beharreko lokala, hautatutako datak eta orduak ezin baitiote trabarik egin aukeratutako lokalean egin ohi diren jardueri. Debekatuta egongo dira gorpu aurreko ekitaldiak, baina baimenduta egongo da ekitaldietan errautes-kutxak izatea. Bigarren kasu horretan, hala adierazi beharko da eskabidean.

6. artikulua.- Instrukzioa, eta ebazpena ematea.

1.- Ebazpena alkatetza dekretu bidez emango da. Bertan finkatuko dira hileta edo omenaldi zibila egiteko tokia, data eta ordua. Eskabidea ezesten bada, arrazoitu egin beharko da. Data, ordua eta tokia finkatzerakoan, aintzat hartuko da eskatzaileak adierazitako lehentasun-ordena, posible den neurrian. Eskabideetan adierazitako ordutegia eta tokia aldatu ahal izango dira, baldin eta eskatutako lokal edo eremuan bestelako erabilerak badaude.

2.- Hileta zibila toki, data eta ordu berean egiteko eskabide bat baino gehiago badago, men egingo zaio Udaleko Erregistroaren sarrera-datari eta eskabide-zenbakiari.

3.- Ordenantza honetan aurreikusi gabeko kontuetarako, udal arduradunen aginduei jarraituko zaie, eta beteko da, era berean, Euskal Autonomia Erkidegoko Hilotzen Sanitate-alderdiei buruzko Erregelamendua onartzen duen urriaren 19ko 202/2004 Dekretuak xedatutakoa.

XEDAPEN GEHIGARRIA

Araudi hau aplikatzeko beharrezko jarduketak egin ahal izango ditu Basauriko Udaleko Alkatetzak.

AZKEN XEDAPENA

Ordenantza hau indarrean sartuko da behin betiko onespena jaso duen testua oso-oso argitaratu, eta aurreikusitako epea igaro eta gero. Hala xedatzen du Toki Araubidearen Oinarriak arautzen dituen apirilaren 2ko 7/1985 Legearen 70.2 artikulua.

Ordenantza hau indarrean sartuko da bere behin betiko onespena Bizkaiko Aldizkari Ofizialean argitaratzen den dataren biharamunean.